



Aqqalu C. Jerimiassen

UPA 2022/115-1

Atassut

4. Maj 2022

**Naalakkersuisut peqquneqassasut takornariaqarnermi suliffeqarfiit ingerlatani nalunaarusiakkut qujaalassallugit, qanoq iliornikkut nunaqavissut inatsisitigut allaffisornikkut aaqqissuussaantertigullu il.il sunniuteqarnerpaamik aaliangiisinnaalernissaat, nalunaarusiaq kingusinnarpaamik inatsisartunut agguanneqassaaq UPA 2023, inatsisartut aaliangigassatut siunnersuut**

(Inatsisartunut ilaasortaq Vivian Motzfeldt, Siumut)

Sooq ullumikkut takornariaqarnikkut taamak inissisimavugut? Sooruna nunaqavissut katataasutut misigisimatinneqartarnerat tusarsaasoq? Tamanna inatsisitigut eqqanaarniassallugu pisariaqassanersoq nalilersugassaavoq pissanganartoq.

Namineq uanga misilittakkakka aallaavigissagukkit, namminersortuunikuuninni takornarialerisutut, allallu takornarialerisut namminersortut apersortarneranni amigaataasoq annertoq tikkuarneqartartoq ataasiuvoq, tassalu qaammarsaasariaqarneq.

Oqaannarsinnaanngilagut inangeriartorneqarluta avataaniit, namminermi tamanna assatsinniimmat. Namineq aatsaat inuiaqatigiittut piumassuseqarutta takornariaqarnikkut ineriartornermi takornariat sullinneqarneri tigusinnaavagut. Inatsisikkut nunaqavissunut pituttuisinnaanermik suliaqalissagutta, avataaniit aningaasaleeqataasinnaasunut innarleeratarsinnaanera, suliffeqarfiillu avataaniit pigineqartunut nunaqavissunik sulisoqartuusut akileraarutitigut isaatitsivigeriikkatta annaaneqaratarsinnaaneri.

Innutaasut akornganni eqqarsartaaseruna allanngortinniagassaasoq, innuttaasoq kinaluunniit piumassuseqalersinnaasariaqarpoq, nunani innutaasoqatini pillugit iliuuseqarnissaminut. Maanna ajoraluartumik utaqqiinnarneq annertuallaarsorinarsinnaammat, tassami uninngaannarluta utaqqigaluarutta, neriullutalu arlaat aallartikkumaartoq pisortalluunniit iliuuseqarumaartut, alloriarneq tulleg angujunngilarput.

Inoqarfiit arlallit takornariaqarnikkut suli annertuumik inerisartariaasut, pikkorissaanertigut qaammarsaanikkullu suliniutigineqarfigisariaqarnerat ukkannerusariaqarparput, inuillu eqqarsalersinnaasariaqarlugit namminersortuunermut aqqummut ikaarsaarsinnaanissaanut avataaniit inangerneqarnissaq avaqqukkusukkunikku. Unnuisarfeqarnermi takornariaqartitsiveqarnerlu pisortaniit aquataassanngimmat, pisortaniit ilusilersungaassanngimmat

pisortaniillu ingerlanniarneqassanngimmat namminersortuusinnaasut unammillilersorneqarsinnaaneri pinaversaartinniarlugu.

Nunaminertanillu atuisarneq eqqarsaatigissangaanni (koncession), siunnersuuteqartup oqariartuutaa isummorsorfissaqqippoq, nunarpummi kikkunnut tamanut takannaaginnarsinnaanngilarput, iluanaaruteqarnissarput tassani pisariaqartuusorinarloq isigisariaavoq. Inatsisinilli tassani pituttortoqarsinnaanera Atassummiit mianernartoqartipparput, aqqutissat allat atorneqarsinnaaneri ujjartussallugit orniginerullutigu.

Soorlumi siuliani taaneqareersoq, uagut nammineq assatsinniippoq, arsaarneqariartuutut misigisimaannarusunngikkutta iliuuseqaqataasariaqarpugut, allanimmi pisuutitassaqaanngilagut, uagununa tassani annerpaamik akisussaasuusugut, uaguussasorlu takornariaqarneq qanoq iluseqartoq nittarsaakkusunnerlugu. Periutsit nunatta avataaniittut tassani ilinniarfigilaarsinnaavagut, nunarsuarmi unnuisarfiippassuit aternik angisuunik ateqartuusut siammarsimasuupput, tassanili ataasiinnarlunniit nunatsinniinnginnera ilisimavarput. Assersuusiulaaaraanni nunarsuatta sinneranut, unnuisarfeqarnikkut ateq angisuupilussuaq Radisson Hotels nunarsuaq tamaat siaarsimasutut inissisimavoq. Naallu piginnittumik ataatsimik arlariinnilluunnit aallaveqartutut allaqqasuugaluarluni, ataatsimik assut torraginarsinnaasumik peqarpoq; tassalu sumiluunniit nunami unnuisarfimmik ammaassatilluni nunaqavissunik piginnittoqartittarpaa, atialu taamaallaat attartortittarlugu (soorunami pitsaassutsikkut piumasaaqatitaqartumik), tamassumallu malitsigisaanik nunaqavissunut iluanaarutaasumik inissisimalersarluni. Soorlumi Radisson blu Reykjavik-imiittoq, illutaa Reykjavik-imi aalisartut peqatigiiffianik pigineqartoq paasitinneqarnikuusunga unnuiffiginerani. Isumalu tassanngaanniit torraalluinnartoq takusimavara, tassami taamaalilluni inniminniiffigineqartarnikkut systemerujussuup ataatsip iluanut pivoq, tassuunakkullu tikikkuminassuseq annertuumittaaq qaffassarneqarluni.

Oqareernittuut, akisussaaffik annerpaaq nammineq uagut assatsinniippoq, uagullu nammineq innutaasutut iliuuseqaanngikkutta qulangeriartorneqarnerput nammineq akueriinnarsimassuarput. Maanna inuiaqatigiinni takornariaqarnikkut namminersortortarisagut misilittagaqarluartut, ingerlarsulereersimasut nuannaartunartutut maligassatut atorneqarsinnaanissaanut qaammarsaasorissallugit atorluartariaqalerpagut. Avammullu nunatta nittarsaanneqarnera suli annerungaartumik inissisimatilerlugu, nunanimi avannarlerni nunatta avammut takornariaqarnikkut nittarsaanneqarneranut sipaggarinnerpaatut inissisimajuarnerput katattariaqalerparput takornariaqarneq siunissalittut aningaasarsiorluarfissatut isigilerniarutsigu.

Taamatut oqaaseqarluta Atassummiit siunnersuut inuussutissarsiornermut aatsitassanullu ataatsimiitsitaliamut innersuupparput.